

Pita Wakmwaek Kumwimp Kar

Mekia Akwapnámp Kar

Pita mámá pas ankwap por kumwi námp te, kwekár tisa ankwap fákáre sios mekamp koumteouráp aropan ankwap pourouráp kar yénkrá farákáp napantá, ‘Am fárákapamp kar wawi kwapono’rá kumwimpon. Am kwekár kar sérarap arop fárákapao arakrá sér, “Kwatae ninik te kwatae mono, fwapono.” Ankwap te, “Jisas te warko ék mono.” Aerá sénapan maok, Pita sérrá, “Jisas te ‘Arop ankwap yaomwi mek pik te mono. Ponankor kwatae ninik pwarará, námonámpok koropanápono’ ria porokwe fek yépékrá yak námpon.” (Sapta 3:9 fek nkeampo.)

Mao sérrá, “Yino aposel fárákapao maok Jisasén wae yi fek nkea, mao yénkrá farákápámp wawi námpara, yumo te yinomp karan saráp wawia Jisasén mér kipo.”

1 ¹ Ono Saimon Pita, ono Jisas Kraisomp tére konamp, maomp aposel yumo Kwarén mér kwapwe sámpea yakáp nap, yumonapok mámá pas kumwia kérép rae. Yumo Kwaro sánknámp mér nap kwapwe kare am te yinomp mér niampono. Jisas Krai te yae-párak kare ara, nomo am mérámp sámp námpon. Mao te nomp Kwar, mao nomwan warko éréképnámp aropono. ² Oukoumwan te yumo Kwar ntia nomp Jisas Tokwae Karamp ninik nep wae mér. Aenapara, ono warákáramp ninik te Kwaro yumwan ninikia yaewourianánko, maomp yonkwae porokwe yumont tokwae kari yak naenámpon.^a

Kristen fákáre paokop mwanap ninik

³ Krai te Kwaromp kárakáre fek nomwan maomp kápae kare ankank ti-sáp nánko, nomo fwap Kwaromp ninikaok paokop mwanámp pwi námpono. Nomo Kwarén méria ninik námpara, nomo am ankank ponankor fwap sámp mwanámpon. Mao nomo mént náráp wae kwapwe ntia náráp yae-párak kare kwapwe kare ninik sámp mwanámpria wumwi námpon.^b ⁴ Am tak námp fek táman maok, mao nomwan námokuráp

^a 1:2 Fl 3:10; Kl 1:9-10 ^b 1:3 Ef 3:16-19

kápaē kare kwapwe kare ankank wokwaek ti-sáp nanamprimpan ti-sáp námpono. Kwatae ankankan kikiank i konámp ninik te aropan kwatae pap konámpono. Aeno am kápaē kare kwapwe kare ankank Kwaro nomwan ti-sáp námp te fwap yumwan yaewour nángo, am kwatae pap konámp ninik am warákár tará, fwap Kwaromp ninikaokiaka mao niamp yakáp mwanapono.^c ⁵Yumo ankár am táman ninikria maok, kwapwe kare ninik te kárákáre fek téreria, am te yiráp Kwarén mér napént tapokwap kip. Tá yumo ankár Kwaro i konámp ninikan mér sámpea, am mér te yiráp kwapwe kare niniként tapokwap kip. ⁶Tá yumo yiráp pourou ankár poukwap kouria maok, Kwaro i konámp ninikan mér sámpea napént tapokwap kip. Tá yumo ankár nkwakwe make kar korop nángo, kárákáre fek fokopeyakápria maok, am yiráp pourou poukwap kour napént tapokwap kip. Tá yumo Kwaro i konámp niamp pourouráp ninik fek paokopria maok, kárákáre fek fokopeyakáp i konap niniként tapokwap kip.^d ⁷Aeria yumo ankár yiráp Kristen ankwapyaenápén ponankor nouroupi yakápria, ankár ponankor aropan aropomp kar kip. ⁸Táte am take pourouráp ninik yiráp ninik mek tokwae kari yak nángo te, yumo Jisas Krai Tokwae Karamp ninikan mérap te tokwae kari akwap námpara, am mér te kwaporok yak mono. Am te fwap kápaē kare tére kwapwe naenámp. ⁹Aeno arop am take pourouráp ninik mo námp te, maomp yi sukupi yaknámp niampara, wakmwaek korop naenámp ankank panek yak námp te nke mono. Mao te Kwaro maomp kwatae ninik ponankor tirá épérimp te wae nik mo, pwar námpon.^e ¹⁰Ononamp fákáre, Kwaro wae yumwan wumwiria, mao náráponoria nánkáráp tenámpon. Aenámpara, yumo ankár kárákáre fek am wumwiri námpaok tukup kip. Yumo takria te, yumo kwatae ninik fek tukup mo, fwapono. ¹¹Táte yumo am ninikaok napo te, yumwan taokor naenámp ankank yak mono. Yumo fwap Kwaromp wonae fik yámar mek tukupea yakáp mwanapono. Nomwan warko éréképámp nomp Tokwae Kar Jisaso am yámar mekamp némp taokeyak námpon. ¹²Aenángo, yumo am ankank wae méria Kwaromp kar kare sámpea, yumo wae kárákáre fek fokopeyakáp napan maok, wampweno, ono ankár yumwan kápaē kare por sénanko, yumo am táman niki yakáp mwanapono. ¹³Ono ninik namp te ono oukoumwan yiki yak namp fek, yumo nik moantánoria ankár yumwan farákáp saráp yak nanamp, am te kwapwe kare ninikono. ¹⁴Nomp Tokwae Kar Jisas Kraiso onan sérrá, “Amo sumpwi nanap ke te wae wonae fik námpono.”^f ¹⁵Aeri námpara, ono mwae kárákáre fek oupouroukria, nánkár wakmwaek ono sumpwi tenanko, yumo fwap kápaē kare por mómá ankank ponankor niki-samp yakáp mwanapono.

^c 1:4 Jo 1:12; Ap 17:28; 2 Ko 3:18 ^d 1:5-6 Ga 5:22-23 ^e 1:9 1 Jo 2:11
^f 1:13-14 Jo 21:18-19; 2 Ko 5:1

Pita Kwaromp wae Jisasomp pouroukamp nkemp kar

¹⁶Yino nomp Jisas Kraiss Tokwae Karao maomp kárákáre fek wakmwaek korop naenámp karan, am kar yumwan farákápámpo. Aempan maok, yino te kwaporok kar mwar karan farákáp mono. Yino yinokump yi kare fek nke nánko, maomp pourouk Kwaromp wae tokwae yak nánko, nkeanámp, yumwan sénámp. ¹⁷Naropwar Kwaro man e tokwae sánkria, man am wae kwapwe kare sánkámpon. Kwar námokuráp yámar mekamp wae tokwae kwapwe meknámp Jisasnámpok kar sámp-kérépria sérrá, “Támáte onomp Tárápono. Ono man warákár tokwae nampono.” ¹⁸Aenángo, yino méntér Kwaro námoku nánapitenámp faonkwek yakáprá wa nánko, am kar yámar meknámp takrá sérimpon.^g

¹⁹Aempan yino am táman nkea wokwaek yakápap profetomp karan mér kárákáre námpono. Yumo kuri am profet fákáreramp kar kárákáre fek niki-samp yakáp nap te, kwapwe kareno. Am farákápamp kar te lamao kirikip mek wae puri yakrá akwapea wakor nánko, Wap Kumur aok konámp niamp te nánkár pwarnámp yae fek Jisas Kraiss ék nánko, maomp wae yiráp ninik meknámp yokor nae-námpono.^h ²⁰Aeno yumo ankár aranénkir mér kip: Nomo te nomoku nomp ninikaokria Kwaromp Buk fek yaknámp profet kar fi fek farákáp mwareano, mono. ²¹Am te apae riteanápe, wokwaek te am profet kar arop ankwap ankárankampao námokuráp ninikaokria profet kar farákáp moimpon. Yiki Kor Spiritao námoku am arop farákápamp ninik mek farákápánko, mao am Kwaro sánkám kar táman arop farákapan farákápapon.ⁱ

Kwekár tisamp kwatae ninik

2 ¹Wokwaek kar kwekár profet farákáp Israel fi mek téreapon. Aeno tá taknámp yumo ou mek kor kwekár tisa farákáp tére mwanapon. Am farákápao kánánkám námokuráp kwekár ninik fek farákápria, yiráp waemp kwatae pap mwanapon. Am farákáp te Jisas Tokwae Karao man kor yamokwapea érékép námpan warko man younkwe sir mwarea napon. Am farákáp takria te námoku támao koupour touwe kwatae sámp mwarea napon.^j ²Aeria kápae kare arop am kwekár tisa farákápamp kokopor ninikaok tukup napo, arop ankwap farákáp nkea Kraissomp ninikaok tukup konap ninikan te wouroump kar sér mwanapon. ³Am kwekár tisa farákáp te maniantá kikiank kar i konap arop farákápapa, kápae kare kwekár kar sérarrá paokoprá, yiráp maniráp ankank ti mwanape. Tak napan maok, wokwaek kar Kwaro yae nánapi pwate námp fek am farákapan kot nánko, am farákápao touwe kwatae

^g 1:16-18 Mt 17:1-5 ^h 1:19 Lu 1:76-79 ⁱ 1:20-21 Ap 3:21; 2 Ti 3:16 ^j 2:1 Lo 13:1-5; Mt 24:24

sámp mwanapon. Am touwe sánk naenámp ankank te apae ampnámp námpanápe, mono. Am te érik karaok yakrá yépék námpon.^k

⁴Wokwaek ensel ankwap fárákap kwatae ninikapo te, Kwaro námoku mwar takanáponoria yépék mono, mao te am fárákapan me tokwae kirikip támáre mek épéri tenánko, am mek yakáprá mao támao kot naenámp yaeran yépék napon.^l ⁵Wokwaek kar Noa koumteouráp aropan 'Kwaromp ninikaok araki yakápenk'rá sérimpon. Aerámpan maok, am fárákap Kwarén younkwe sirapo kor, námoku mwar takanáponoria yépék mono, mao éntenk tokwae sámp-kérépánko, am fárákap ponankor ént mek faokarapono. Aeno Noa te am fárákapan yae-párák kare ninik farákápámp aropara, Kwaro Noa ntia maomp fákánek séraroan taokeyakánko, yae-párák yakápiapono.^m

⁶⁻⁸Sodom ntia Gomora te taun tokwaenono. Am mekamp kwatae kare arop fárákap poumou kokokoporrá paokop napara, Kwaro séránko, yaomwirao fári pwatenánko, yaomwi ntu mwar yakámpon. Am taun anánkaopwe mekamp aropan touwe kwatae sánkámp te, nánkár wakmwaek Kwarén younkwe sinámp aropan touwe kwatae am fárákapan kor korop naenámpan yéncép námpon. Loto am Sodom, Gomora mekamp kwataenap arop ou mek yakria am fárákapamp kwatae ninik nkerá, kumur méntép kwatae kar sérarapo, wawimpon. Aenámpao maok, maomp ninik te yae-párák kare yakria maok, am fárákapao lo kwe-sirarrá, kwatae sokoro nap táman nkea, kokwae kareria, tak te mon karrá ninik tokwae námpon. Aenámp fek, Kwaro am yae-párák kare Lotén am yaomwi wouroukourámp mekamp warámpánko, fwap yakámpon.ⁿ ⁹Kwaro tak i konámpara, nomo wae mér, arop Kwaromp ninikaok tukup napo, man ankank kwatae korop nánko te, Kwaro am wae nkea mérianámpan man yaewour i konámpono. Táte kwataenap aropan kor Kwaro wae nkea mér námpara, nopok am fárákapan touwe kwatae nénk nanampria oukoumwan ti-fákeyakrá akwapea kot naenámp yae fek naenámpon.^o ¹⁰Táte koumteouráp arop pourouk énoukourá kikiankáprá kwatae kare ninik fek kokoporria, Kwaromp lo karan te kánanke kwataeran mpwenap arop fárákapan Kwaro youpoukwap tokwaeaka touwe tokwae kar nénk naenámpon.

Tá am yiráp ou mek yakápnap kwekár tisa fárákapao ták-sirirá paokoprá námokuráp ninikaok saráprá, kárákáre kor enselén te wouroump kar sérria apáp mo i konapono. ¹¹Aeno am ensel fárákapamp kárákáre tokwae te am arop fárákapan kámákár akwap námpan maok, Kwaro nke námp fek am kárákáre kor ensel fárákapao am fárákapan wouroump kar sérria kot mo i konapono.

^k 2:3 Ro 2:24; 16:18 ^l 2:4 Mt 25:41 ^m 2:5 Stt 6:13,18; Hi 11:7 ⁿ 2:6 Stt 19:12-13,24
^o 2:9 1 Ko 10:13

¹² Am arop fárakap te yao pwae mekamp nape firao yonkwae kour moria námokuráp ninik fek kwaporok paokop i konapnámp, arop ankwap fárakapao kor kar karean sénapo te, am mér moria wouroump-sér i konapono. Am nape fir éntupwaro morok fékériánánko, arop yénképrá fári konapono. Am arop fárakapao kor nape firao i konapnámp taknámp wour mwanapono. ¹³ Am fárakap arop ankwap fárakapan nkwakwe make kwatae ninik napo, nopok touwe kwatae sámp mwanapon. Námokuráp pouroukamp ninikaok nap te kumuruk saráp mono, wae fek kuri takrá paokoprá, kwapwe kare ritea warákár konapono. Takria am fek yumont koupoukarrá fánapao maok, maomp kwatae ninik nap yumo ou mek yakápria, yumwan oumi papria, yiráp eran kor kwatae pap napon. Aenapao maok, am fárakap te námokunap kwekár ninik táman warákáránk i konapono. ¹⁴ Am fárakapamp yi te kápae kare por kounteoump pourouk énounkouprá kokopor mwanap ninikan sámpá paokopria, kwatae ninik te pwar mwanap pourou mo námpono. Táte arop ankwap fárakap ninik kárakáre mo napan, kar porokwerá kwatae ninik mwaria érékép-tukup konapon. Am fárakap te ankwapamp ankank kikiank mwanap ninik waeman mákia maránki yakáp napon. Nánkár Kwaro am fárakapan touwe kwatae kare nénk naenámp. ¹⁵ Am fárakap kwapwe kare ninikaok paokop i konap te pwararea, yiki mwaek tukupria épéréprá paokop napon. Am fárakap te Beoromp táráp profet Balamomp ninikaok tukup napon. Mao te kwatae ninikria am fek mani sámp naeria kikiankimpon.^p ¹⁶ Donki kar sér mo i konámpao maok, Balamo am tak námp fek mao aropnámp kar sérria Balamomp kwatae ninikan yoporimpon. Am donki taknámp ninik te profet Balamomp ninik am épéperép naerianámp táman taokari námpon.

¹⁷ Am kwekár tisa fárakap te ént merao torokwari yak námp niampono. Táte warákam támárenámp kouwerao ouwi tokwaerao sámpea yarak námp niampon. Am taknap arop fárakapampor te Kwaro kirikip tokwae mek tukup mwanap némp nánapi pwate nánko yak námpon.^q ¹⁸ Am arop fárakap te nkwak mak mwanámprá épérépnámp kar sérara wae konapono. Arop ankwap fárakapan, kokoporrá pouroukamp nkwakwe make kwatae ninikanáponoria kar porokwerá sérar i konapono. Am fárakap tak nap támao, arop ankwap oukoumwan kar táman kwatae ninikao fákapá yak námp mekamp pwarará Kwaronámpok korop nap arop fárakapan poupwekáp napo, warko am kwatae ninik mek tukupea fákapá yakáp napon. ¹⁹ Am kwekár tisa fárakap am arop fárakapan sérrá, “Yumwan te apae ankankao fákapá fákeyak námpanáp, fwapon.” Aerá sénapao maok, mao námoku kare te kwatae ninikao fákapá fákeyak námpon. Am te arak i konámp: Ankwap ankankao aropan poukeyak

^p 2:15 Nam 22:12,15-17,21,23,28-34 ^q 2:11-17 Érik 9-13

nánko te, am arop te man poukeyaknám anankamp yae ankore mek yak konámpono.^r ²⁰Tá kare, am fárakap waeman nomp Tokwae Kar námwan warko éréképnám Jisas Kraisen mér kareria, am apárokamp kwatae ninikao fákapá yak nám pwarará, Jisas Kraisonámpok korop napon. Aenapan maok, am fárakap warko arári tukupea, am mek fákapá fákeyakáp nap te araki yakáp napon: Manénkir kwatae ninik fek fákapea, kwatae yakápiapan maok, táte warko tukupea fákapá yakápria kwatae kare yakáp napon.²¹ Aeno am fárakapao yae-párak kare paokopnap ninik mér mo nap te, am te kwatae napon. Aeno táte am fárakapao Kwaro sánknám yiki kukur sánk konám lo sámpea napao, am táman younkwe sánk nap te, waeman kwatae kare napon.^s ²²Amnap ankank te as ntia kouao nepo, sér i konám. As youpouki pwatea, warko arákarrá akwapá youpouk fári konám niamp. Táte ankwap kar sérrá: Kou ént mek éntupia pourou yiki kwapwe námpao maok, warko akwapea kwar takére mek énou i konám niampono.^t

Kwaro korop naenám yae yaknám kar

3 ¹Onomp fákáre kare! Má pas máte yiráp por ono anánkan kumwi nampono. Yumo yae-párak kare ninik mwanapria kárakáre fek sérria, mámá pas anánkaopwe kumwi namp te, yumo am táman nkea warko ninikia niki yakáp mwanapon.^u ²Onomp ninik te, yumo Kwaromp wokwaek yakápap e tokwaeráp profet fákáreráo wakmwaek korop naenám ankankan farákápap aran warko ninik kipria nampon. Yumo ankár nomwan warko éréképnám Jisas Krai Tokwae Karamp lo yiráp aposel fárakapao yumwan farákáp napo wawi nap, am fwapi niki-samp kip.

³Aeno yumo ankár tokwae kar ankank aran mér kip: Pwar naenám ke fek kwatae ninik mwar karrá kikiankria ankár táman saráp paokop i konap arop fárakap koropea, wouroumprá arakrá sér mwarea napon: ⁴“Mao te warko arákarrá korop naenám nie? Mao te maok yak námpono? Mao te korop mono. Wokwaek nomp tékénou fárakap wouri nap feknámpia koropea oukoumwan nám te, kápae kare ankank wokwaek kar forokarámp feknámpia taki yak námpono.” ⁵⁻⁶Kwaro wokwaek kar séránko, yámar me tokwae yak, apár tokwae ént meknám aokea yak nám, am táman ninik mwarea, ninik mono. Tá wakmwaek Kwaro séránko, am ént támao nákkarrá aokria, apár ponankor oupouroupea kwatae papámpono. Aempan maok, arop fárakap te am táman ninikia mér mwanapan, mo napon.^v ⁷Am kar támao yámar ntia apár taokor fákeyak nánko, oukoumwan yakria, yaomwi koropria

^r 2:19 Jo 8:34; Ro 6:16-17 ^s 2:20-21 Mt 12:43-45; 26:24; Hi 6:4-6 ^t 2:22 Snd 26:11

^u 3:1 1 Ti 4:1; Érik 17-18 ^v 3:5-6 Stt 1:2,6-9; 7:11,17,23

ponankor wouroukour naenámp kean yépék námpon. Yámar ntia apár Kwarén younkwe sinap arop fárákap kotia touwe sámp mwanap ke táman yépék námpon.^w ⁸ Kwaro nke námp fek kápae kare yopwar akwap námpao kor, ankárankamp yae niampono. Tá ankárankamp yae te 1,000 yopwar niampono. Ononamp fákáre, yumo am ninik nik moi kwapono. ⁹ Takria arop ankwap fárákap, Tokwae Karao ék nanampri námp te mae ékénrá ninik mwanape. Mao te arop ankwap ankárankamp yaomwi mek pik te mono. Ponankor arop kwatae ninik pwarenk ritea yumwan ninikria porokwe fek yépékrá yak námpon.^x

Mámá apár ntia yámar me pwar naenámp kar

¹⁰ Aeno Jisaso Tokwae Kar ék naenámp yae te nomo oukoumwan sikan mpwe nánko, oukun aropao i konámpnám kwaporok koupour ék naenámp. Am ke fek yámar mek pourounk tokwaeria, yámar moyak nánko, ankank kápae kare ponankor yaomwirao fári pwar naenámp. Apár ntia kápae kare ankank am mek yakáp námp, am táman kor ponankor yaomwirao fépér naenámp.^y ¹¹ Aeno am ankank taki pwar nánko te, yumo ankár mokoep arop yakáp mwanapono? Yumo ankár yiki kare ninik fek Kwaro niniknám taknám paokop kip. ¹² Yumo ankár amnap ninik fek tapek am Kwaromp Yae yépék kip. Tá yumo ankár kárákáre fek tére napo, am yae koupour korop naenámp. Am yae fek táman yámar me tokwae yaomwi wouroukoumpia tomoromp nánko, touwe kare yaomwirao ankank kápae kare ponankor wouroukoumpianánko, énténti akwap naenámp. ¹³ Mao wokwaek sérimp te ará: “Námo yámar me wourékam yoro, apár wourékam yoroia nanko, am fek te yae-párák kare ninik mwar yakáp mwanapon.” Aerimpan nomo am ankank táman saráp yépék námpon.^z

Nomo ankár yiki kor yakápria Jisasén yépék mwanám kar

¹⁴ Ononamp fákáre e, yumo am ankank táman yépék napara, yumo ankár tére kárákárerá yiki kukur yakáp napo, kwataenámp ankank yak moria, yumo ankár Kwarént ankárankamp pourouráp ninik fek yakáp kipo. Aenapo, nánkár wakmwaek Kwaro yiráp yae-párák yakápnáp ninik nke naenámp. ¹⁵ Yumo nomp Tokwae Kar oukoumwan yépék námp nkeaka arakrá ninik kip: Aropao man mér nánko, fwap am fárákapan érékép nanampria yépék námpon. Kwaro nomp Kristen ankwapnáp kare Polén ninik kour kwapwe sánk nánko, mao kuri yiráp por make pourouráp kar kwapwe kumwia kérépámpono.^a ¹⁶ Polomp kápae kare pas fek te mámá kar táman sér i konámp. Maomp kar ankwapmwaek

^w 3:7 1 Ko 3:13 ^x 3:8-9 Sng 90:4; Ese 18:23; 1 Ti 2:4 ^y 3:10 Mt 24:35,43-44

^z 3:13 Ais 65:17; Yé 21:1,27 ^a 3:15 Ro 2:4; 10:21

am pas fekamp te érik farákár mo nánko, nomo fwapia ninik mwanámp pourou mo námpono. Arop ankwap fárákap yonkwae kour moria, kárákáre fek fokopeyakáp mo nap, am kar sámpea yiki mwaek tukupria, Kwaromp Buk fekamp kar ankwapmwaekan kuri tak napono. Taknap arop fárákap am fek touwe kwatae sámp mwanapon.^b

¹⁷Ononamp fákáre, yumo am wakmwaek korop naenámp ankank te wae nik napono. Aenapara, yumoku támao ankár fwapia mér fek yakáp kip. Takria lo kwe-sir konap arop fárákapamp kwekár karao yumwan éréképá akwap nánko, yumo warko mér kárákáre fek fokopeyakáp mo mwanape.^c ¹⁸Yumo ankár Jisas Tokwae Kar nomwan warko érékép konámp, maomp aropomp tokwae mek yakáp kipo. Aeria maomp aropomp ntia man méria ninik nap táman sámp-samp napo, yiráp ninik mek tokwae kari yak naenámp. Nomo oukoumwan, tá nánkáráp kuri Kraisomp e ankár warákarrá sakap saráp yakáp mwanámpon. Kare tak mwanámpono.

^b 3:16 2 Ko 4:3; Hi 5:11 ^c 3:17 1 Ko 10:7-11; Hi 2:1